

- पेरिस च आर्टिफिशल इंटेलीजेंस एक्शन शिखर सम्मेलन च प्रधानमंत्री नरेंद्र मोदी होरें आखेआ जे ए.आई लक्खें लोकें दे जीवन गी स्वास्थ्य, शिक्षा, राई-बाई च बेहतरी आहिनयै बदली सकदा ऐ।
- प्रधानमंत्री नरेंद्र मोदी होरें आखेआ जे भारत पेरिस समझौते दे लक्ष्यें गी हासल करने आहला पैहला जी-20 देश।
- लोकसभा ते राज्यसभा च आम बजट 2025-26 उप्पर चर्चा जारी।
- महिला ते बाल विकास मंत्री अन्नपूर्णा देवी होरें आखेआ जे केंद्री बजट 2025-26 च महिलाएं दे कल्याण लेई 4 लक्ख करोड़ रपे रक्खे गेन जेडा जे पिछले बरें दे मकाबले 37 फीसद मता ऐ।
- स्वामित्व योजना तैहत सरकार नै कोई 2 करोड़ 35 लक्ख कोला मते संपत्ति कार्ड बंडे ना।
- केंद्री गृह मंत्री अमित शाह होरें साइबर अपराधें थमां पार पाने लेई 4 स्तरीय रणनीति अपनाने दी गल्ल आक्खी।

<><><><><><>

PM-AI

प्रधानमंत्री नरेंद्र मोदी होरें ए.आई एक्शन समिट च बोलदे होई आर्टिफिशल इंटेलीजेंस दी बदलाव आहली शक्ति गी उजागर कीता। प्रधानमंत्री होरें इस शिखर सम्मेलन दे फ्रांस दे राष्ट्रपति इमैनुअल मैक्रों हुंदे कन्नै सह अध्यक्षता कीती। प्रधानमंत्री होरें ए.आई दे राजनीति, आर्थिक, सुरक्षा ते समाज च आवा रदे बदलाव पर चर्चा कीती। उनें साइबर सुरक्षा, गलत सूचना ते डीफ फेक्स बारै सब्बनें गी जिम्मेदारी कन्नै किट्टे रलिए जत्त करने पर जोर दित्ता। उनें भारत च 1.4 बिलियन लोकें लेई डिजिटल ढांचा तैयार करने दी भारत दी सफलता गी उजागर कीता। उनें ए.आई आधारित भविक्ख लेई हुनर ते उस हुनर गी परतिए होर निखारने दी जरूरता लेई निवेश दी बी गल्ल कीती। उनें सेहत, शिक्षा ते राई-बाई च ए.आई दी समर्थ गी बी उजागर कीता।

<><><><><><>

PM-Energy Week

प्रधानमंत्री नरेंद्र मोदी होरें आखेआ ऐ जे पिछले इक्क दाहके च भारत 10मीं थाहरा कोला बधिये 5मीं सब्बनें शा बड्डी अर्थ बवस्था बनी गेआ ऐ। प्रधानमंत्री होरें अज्ज भारत उर्जा सप्ताह 2025 दे वर्चुअल माध्यम कन्नै उद्घाटन करदे होई एहू गल्ल आक्खी। प्रधानमंत्री होरें आखेआ जे भारत दी सौर उर्जा उत्पादन छमता पिछले 10एं बरें दौरान 32 गुणा बदी गई ऐ जेदे कन्नै एहू दुनिया दा त्रीया सब्बनें शा बड्डी सौर उर्जा उत्पादक देश बनी गेआ ऐ। उनें आखेआ जे भारत दी गैर जीवाश्म ईंधन उर्जा छमता त्रै गुणा बदी ऐ ते भारत पेरिस समझौते दे लक्ष्य गी हासल करने आहला पैहला जी-20 मुल्ल

ऐ। श्री मोदी हों आखेआ जे अज्ज भारत दा जैव ईधन उद्योग तेजी कन्नै बढने लेई तैयार ऐ। प्रधानमंत्री हों आखेआ जे भारत दे कई उर्जा लक्ष्य औने आहले समें-सीमा दे मताबक ना।

<><><><><><>

PPC-Deepika

प्रधानमंत्री नरेंद्र मोदी हों अज्ज आखेआ जे मानसिक स्वास्थ्य ते तंदरुस्ती उनें सब्बने ंआम विषें चा ऐ जिस उप्पर परीक्षा देने आहले चर्चा करना चाहंदे ना। सोशल मीडिया पर पोस्ट करदे होई श्री मोदी हों आखेआ जे इस बरे परीक्षा पे चर्चा च इस विषे पर विशेष रूप नै इक एपीसोड हा। प्रधानमंत्री हों घोषणा कीती जे एहू एपीसोड कल प्रसारित कीता जाग ते इस विशे गी लेइयै अभिनेत्री दीपिका पादुकोण गल्लबात करंगना।

<><><><><><>

Mahakumbh

कल माघी पुण्णेया स्नान कोला पैहले प्रयागराज महाकुम्भ च तैयारियां जोरें पर ना। इस स्नान दा मता महत्व ऐ कीजे एहू कल्पवास करने दे विशेष अनुष्ठान दा समापन ऐ। इस अवधि दौरान कल्पवासी संगम दे घाटें कोल अस्थाई आवासें च रौहंदे ना। इस बरे महाकुम्भ च 10 लक्ख शा मते लोकें कल्पवास कीता ऐ। उत्तर प्रदेश सरकार आसेआ श्रद्धालुं गी जरूरी सेवां प्रदान करने ते प्रभावी यातायात प्रबंधन लेई विशेष बवस्था कीती जा'रदी ऐ।

<><><><><><>

LS Budget Session

लोकसभा च अज्ज आम बजट 2025-26 पर चर्चा फही शुरू होई। चर्चा च हिस्सा लेंदे होई समाजवादी पार्टी दे अखिलेश यादव हों आखेआ जे कल्याणकारी योजनाएं दा लाहू जमीनी सतह पर लोकें तोड़ी नेई पुज्जा'रदा ऐ। उनें सरकार पर विकसित भारत विजन ते करसानें दी आमदन दूनी करने लेई कोई दिशा नेई होने दा आरोप लाया। उनें आरोप लाया जे एहू बजट तयशुदा लक्ष्य आहला बजट ऐ, एहू समृद्ध ऐ ते उद्योगपतियें पर केंद्रित ऐ। उनें महाकुम्भ मेले दौरान प्रयागराज च ट्रैफिक जाम दी स्थिति गी लेइयै सरकार दी आलोचना कीती। चर्चा च शामिल होंदे होई बीजेपी दी हेमा मालिनी हों आखेआ जे देश च महिलाएं ते करसानें पर ध्यान केंद्रित करदे होई तेजी कन्नै विकास होआ रदा ऐ। उनें आखेआ जे ग्रामीण खेत्तरें च स्कूल प्रगति करा रदे न ते स्वास्थ्य सुविधां बेहतर होइयां ना।

<><><><><><>

RS-Budget Discussion

राज्यसभा च आम बजट 2025-26 पर चर्चा फही शुरू होई। चर्चा च हिस्सा लेंदे होई बीजेपी दे भागवत कराड़ हों आखेआ जे सरकार आसेआ पुट्टी गेदी सकारात्मक गैंड करी राजकोषीय घाटे च 0.4 फीसद दी कमी आई ऐ। उनें आखेआ जे परतक्ख लाहू मुंतकिली थमां पैहे मुतल्लक या फी होर सरबंधित जानकारी या भेद पता लगने कोलां रोकने च मदद थहोई ऐ ते सरकारी पैहे दी बचत होई ऐ। चर्चा च शामिल हूंदे होई राष्ट्रवादी कांग्रेस पार्टी दे प्रफुल पटेल हों विश्वास जताया जे

प्रधानमंत्री मोदी हुंदी अगुवाई च देश औने आहले बरें च दुनिया दी 3 सब्बनें शा बड्डी अर्थ बवस्था बनी जाग। उनें आखेआ जे देश नै बुनियादी ढांचा खडेरने च खासा प्रगति दर्ज कीती ऐ।

<><><><><><>

RS-Health

केंद्री स्वास्थ्य ते परोआर कल्याण मंत्री जगत प्रकाश नड्डा होरें आखेआ जे सरकार देश दे आदिवासी खेत्तरें च चिकित्सा ते सवास्थ्य सेवाएं दा विस्तार करने लेई सब्बै उपाऽ करा रदी ऐ। अज्ज राज्यसभा च एह जानकारी दिंदे होई उनें आखेआ जे डाक्टरें गी आदिवासी खेत्तरें च रौहने ते चिकित्सा सेवां प्रदान करने लेई प्रोत्साहित करने दे कई उपा कीते गेन।

<><><><><><>

FMGST

खजाना मंत्री निर्मला सीतारमण होरें अज्ज आखेआ जे जीएसटी काउंसल देश भर च जीएसटी क्लासीफिकेशन एंड टेक्सेशन सरबंधी लागू करने लेई संवैधानिक अधिकार ऐ। राज्यसभा च जिमनी सुआलें दा परता दिंदे होई उनें साफ कीता जे कुसै बी जीएसटी क्लासीफिकेशन दा फैसला इक तरफा फैसला नेई ऐ।

<><><><><><>

Women Welfare

महिला ते बाल विकास मंत्री अन्नपूर्णा देवी होरें आखेआ जे 2025-26 दे केंद्री बजट च महिलाएं दे कल्याण लेई रिकार्ड स्तर पर 4 लक्ख करोड़ रपे शा मती रकम रक्खी गई ऐ जेड़ा जे पिछले बरे थमां 37 फीसद मता ऐ। नमीं दिल्ली च अज्ज मीडिया गी जानकारी दिंदे होई मंत्री होरें आखेआ जे मुलखे दी आर्थिक प्रगति पिच्छे महिला उद्यमियें दा बल ऐ। उनें आखेआ जे हुन कुल बजट दा 8 अशारिया 8-6 फीसद ऐ जेड़ा जे माली बरे 2024-25 च बदिये 6 अशारिया 8 फीसद होई गेआ ऐ। केंद्रीय मंत्री होरें 7में पोषण पखवाडे दी घोषणा करी दिती जेड़ा जे इस बरे दे 18 मार्च थमां 2 अप्रैल तोड़ी शुरू होग।

<><><><><><>

Govt. Svamitva

सरकार नै आखेआ ऐ जे ग्राएं दे सर्वेक्षण ते ग्रामीण खेत्तरें च उन्नत टेकनालजी कन्नै मैपिंग स्वामित्व योजना तैहत हुनै तोड़ी 1 लक्ख 59 ज्हार ग्राएं च 2 करोड़ 35 लक्ख शा मते संपत्ति कार्ड बंडे गेन। लोकसभा च अज्ज पंचैती राज मंत्रालय च राज्यमंत्री एस.पी सिंह बाघल होरें आखेआ जे प्रधानमंत्री नरेंद्र मोदी होरें आपूं 18 जनवरी गी बक्ख-बक्ख राज्यें ते केंद्र शासित प्रदेशें दे 52 ज्हार ग्राएं च 65 लक्ख कार्डें दे ई बंड दी निगरानी कीती ऐ। उनें आखेआ जे कोई 3 लक्ख 18 ज्हार ग्राएं दा ड्रोन सर्वेक्षण पूरा होई चुकेआ ऐ।

<><><><><><>

Shah Cyber Crime

केंद्री गृह मंत्री अमित शाह होरें आखेआ जे सरकार साइबर अपराधें शा निब्वडने लेई चार स्तरीय रणनीति अपना रदी ऐे जिस च आपूं च तालमेल, संचार ते छमता च बाद्दा शामिल ऐे। अज्ज नमीं दिल्ली च साइबर सुरक्षा ते साइबर अपराध विशे पर गृह मंत्रालय दी संसदीय सलाहकार समिति दी बैठक गी संबोधित करदे होई गृह मंत्री होरें साइबर अपराध गी रोकने लेई जनता बश्कार जागरूकता बदाने दे महत्वै पर जोर भरेआ। उनें समिति दे सदस्यें गी इस बारै च जारी हेल्पलाइन नंबर 1930 गी मते कोला मता प्रचार करने दी गुजारश कीती।

<><><><><><>

Om Birla Maldives

मालदीप दे इक संसदीय प्रतिनिधिमंडल नै अज्ज संसद च लोकसभा अध्यक्ष ओम बिरला कन्नै मलाटी कीती। इस प्रतिनिधिमंडल दी अगुवाई मालदीप दी पीपल्स मजलिस दे अध्यक्ष अब्दुल रहीम अब्दुल्ला करा'रदे ना। इस दौरान श्री बिरला होरें आखेआ जे भारत ते मालदीव्स बश्कार सदियें पराने सांस्कृतिक, आर्थिक ते बपारिक सरबंध ना। उनें आखेआ जे मालदीव कन्नै सरबंध भारत दी गुआंड पैहले आहली नीति ते विजन सागर दा इक महत्पूर्ण थम्म ऐे। उनें प्रतिनिधिमंडल गी संसद आसेआ अपने कम्मकाज च अपनाई गेदी डिजिटल तकनीक बारै बी जानकारी दिती।

<><><><><><>

Defence-Minister

केंद्री रक्षा मंत्री राजनाथ सिंह होरें अज्ज एयरो इंडिया शो दौरान बेंगलुरु च रक्षा मंत्रियें दे सम्मेलन गी संबोधित कीता। उनें जोर देइयै आखेआ जे कमजोर हालात कन्नै अंतरराष्ट्रीय बवस्था ते शांति यकीनी नेई कीती जाई सकदी। उनें दस्सेआ जे संघर्षे दी बददी गिनतरी दुनिया गी होर मता कमजोर करा रदी ऐे ते बदलदे सुरक्षा हालात लेई नमां नजरिया ते मजबूत सांझेदारी दी जरूरत ऐे।

<><><><><><>

CM-Fire Victims

मुख्यमंत्री उमर अब्दुल्ला होरें कंगन दे विधायक मियां मेहर अली ते गांदरबल दे जिला प्रशासन दे अफसरें कन्नै सोनमर्ग दा दौरा लाया। उनें इस दौरान हाल च अगग लग्गने आहली घटना करी प्रभावित लोकें कन्नै मलाटी कीती। इस घटना च केई दुकानें गी नुकसान पुज्जा हा। उनें नुकसान दा आंकलन कीता ते प्रभावित परोआरें कन्नै मलाटी कीती ते सरकार आसेआ हर संभव सहायता दा भरोसा दोआया। उनें राहत ते पूर्णबहाली सरबंधी जतनें गी फौरी तौर यकीनी बनाने पर जोर पाया। इस दौरान उनें अधिकारिएं गी हिदायत कीती जे ओहू प्रभावित परोआरें गी आरजी आसरमें, माली इमदाद ते लोडचदी सप्लाई उपलब्ध करोआन।

<><><><><><>

Doda-Drone

डोडा जिले च अगले 2 म्हीनें आस्तै ड्रोन दे इस्तेमाल ते उसी लेई जाने पर पाबंदी लाई दिती गई ऐ। एहू गैंड राष्ट्र विरोधी तत्वें आसेआ ड्रोन दे गलत इस्तेमाल गी रोकने लेई पुट्टी गई ऐ। हालांकि पुलस ते होर दुए सुरक्षाबले गी इस पाबंदी थवां बाहर रक्खेआ गेआ ऐ। सरकारी मैहकमे, जेडे नक्शे, सर्वे ते होर दुए अधिकारिक कम्में लेई इंदा इस्तेमाल करदे न, उनेंगी एहूदे लेई इजाजत लैनी होग। अतिरिक्त जिला मजिस्ट्रेट होरें हिदायत कीती ऐ जे जेडे बी लोक जिंदे कश ड्रोन हैन ओहू नजदीकी पुलस स्टेशन च इक हफते दे अंदर-अंदर इनेंगी जमा करोआई देन। इस पाबंदी दा मकसद महत्वै आहली थाहरें दी ते मती अबादी आहली थाहरें दी सुरक्षा यकीनी बनाना ऐ।

<><><><><><>

CS-Broadband

जम्मू-कश्मीर च राष्ट्रीय ब्राडबैंक मिशन दी अमलावरी गी रफतार देने दे मकसद कन्नै मुख सचिव अटल डुल्लू होरें सिविल सचिवालय श्रीनगर च 7मीं प्रदेश ब्राडबैंक कमेटी दी बैठक दी अध्यक्षता कीती। बैठक च बक्ख-बक्ख मैहकमें दे अधिकारी शामिल होए। इस दौरान केई प्रमुख मामलें पर ध्यान केंद्रित कीता गेआ जियां 4-जी तगर सब्बनें दी पुज्ज 5-जी दी अमलावरी ते ब्राडबैंक नेट प्रोजेक्ट। बैठक दौरान मुख सचिव होरें बक्ख-बक्ख मैहकमें बश्कार तालमेल पर जोर पाया तां जे अडचनें गी दूर करिए लक्ष्यें गी हासल कीता जाई सकै। उनें डिप्टी कमिशनरें गी आखेआ जे ओहू थाहरें दी शिनाख्त करने, मोबाइल टावर लेई बिजली उपलब्ध करोआन।

<><><><><><>